

Na osnovu čl. 1., 4. i 8. Zakona o prijenosu, regulatoru i operatoru sistema električne energije u Bosni i Hercegovini ("Službeni glasnik BiH", br. 7/02 i 13/03), Državna regulatorna komisija za električnu energiju, na sjednici održanoj 23. septembra 2009. godine, donijela je

ODLUKU
O IZMJENAMA ODLUKE
O OBIMU, UVJETIMA I VREMENSKOM RASPOREDU OTVARANJA TRŽIŠTA
ELEKTRIČNE ENERGIJE U BOSNI I HERCEGOVINI

Član 1.

U Odluci o obimu, uvjetima i vremenskom rasporedu otvaranja tržišta električne energije u Bosni i Hercegovini ("Službeni glasnik BiH", broj 48/06) član 4. stav 1. mijenja se i glasi:

"Status kvalificiranog kupca mogu steći svi kupci osim kupaca iz kategorije potrošnje domaćinstva, koji ovaj status mogu steći od 1. januara 2015. godine."

Član 2.

U članu 5. stav 1. riječi: "Regulatorna komisija za električnu energiju Republike Srpske" zamjenjuju se riječima: "Regulatorna komisija za energetiku Republike Srpske".

Stavovi 2., 3. i 4. brišu se.

Član 3.

Ova odluka stupa na snagu osmog dana od dana objave u "Službenom glasniku BiH", a objavit će se i u službenim glasilima entiteta i Brčko distrikta Bosne i Hercegovine.

Broj: 04-02-147-12/09
23. septembra 2009. godine
Tuzla

Predsjedavajući Komisije
mr Vladimir Dokić

Obrazloženje

U okviru svojih ovlaštenja da realizuje temeljnu namjeru Zakona o prijenosu, regulatoru i operatoru sistema električne energije da se omogući i ubrza stvaranje tržišta električne energije u Bosni i Hercegovini i regionalnog tržišta električne energije, Državna regulatorna komisija je 8. juna 2006. godine donijela Odluku o obimu, uvjetima i vremenskom rasporedu otvaranja tržišta električne energije u BiH (“Službeni glasnik BiH”, broj 48/06).

Promjene legislative u periodu poslije donošenja ove odluke, ratifikacija Ugovora o uspostavi Energetske zajednice (“Službeni glasnik BiH – Međunarodni ugovori”, broj 9/06) i posebno usvajanje trećeg paketa Evropske unije o energetsom tržištu, zahtijevaju prilagođavanje i ove odluke DERK-a aktuelnoj situaciji i brojnim zahtjevima za bržu i efikasniju uspostavu tržišnih odnosa u energetsom sektoru.

Ovome treba dodati i činjenicu da su termini od kojih se omogućava stjecanje statusa kvalificiranog kupca nastupili za sve kategorije kupaca, sem domaćinstava, u kom smislu se članom 1. usklađuje postojeća odluka.

Članom 2., izostavljanjem odredbi stavova 2., 3. i 4, člana 5. postojeće odluke DERK-a, podstiče se i pospješuje proces otvaranja tržišta. Naime, postojeće odredbe mogu se tumačiti kao ograničenje entitetskim regulatornim organima da, poštujući odredbe relevantnih direktiva Evropskog parlamenta i Vijeća EU, kao i zvanične stavove nadležnih kreatora energetske politike, preciznije definiraju uvjete i kriterije za stjecanje i promjenu statusa kvalificiranog kupca.

Prijedlog ovakve deregulacije u obavljenoj javnoj raspravi izazvao je rezervu kod jednog dijela tarifnih kupaca da ugrožava njihovo pravo na slobodan izbor načina snabdijevanja električnom energijom. Međutim, cilj izmjene odluke nije da izlazak kupca na slobodno tržište bude rezultat prinude neke odluke državnog regulatora, nego iskorak u otklanjanju prepreka ostvarenju otvorenog i konkurentnog energetskeg tržišta na koje značajno utiče pogodnost postojanja regulisanih cijena.

O prijedlogu odluke je pribavljeno i mišljenje Konkurencijskog vijeća Bosne i Heregovine, pod brojem: 01-01-26-493-1-1/09 od 16. juna 2009. godine.